

Rendaquint semestril da la BCG 2020

La banca fa frunt activamain a las circumstanzas extraordinarias. Ella preschenta in resultat fitg stabil e metta ferm accents da solidaritad e d'attaschadadad.

Cuira, ils 23 da fanadur 2020 – La Banca Chantunala Grischuna (BCG) guarda enavos sin in emprim semester 2020 fitg pretensius. La banca ha cumprovà sia vischinanza a la clientella ed al spazi economic grischun en ina fasa turbulenta. Cun in gudogn dal concern da 95.2 milliuns francs ha ella ultra da quai cuntanschì in meglier resultat che spetgà anc avant trais mais. Il cussegl da banca ha dà l'incumbensa da fundar ina „interpresa grischuna da provediment“ per rinforzar la posiziun sin il martgà da provediment.

Las cifras distinctivas:

- gudogn dal concern: CHF 95.2 miu. / -5.2%
- resultat da fatschenta: CHF 96.8 miu. / -6.8%
- afflussiun da novs daners: CHF +1'075.6 miu. / +3.0%
- creschientscha da las ipotecas: CHF +270.0 miu. / +1.6%
- relaziun da custs e d'entradas II: 51.1%
- rentabilitad (ROE): 7.0%

«Nus sco banca dals Grischuns essan loschs d'avair surpiglià a moda sperta ed effectiva nossa responsabladad. L'emprim semester extraordinari ha confermà la resistenza da crisa da la banca e nus avain plaschair da tuttina pudair realisar ils accents da noss project da giubileum #gkb2020», constatescha il president da banca Peter Fanconi. Il CEO Daniel Fust è cuntent cun l'emprim resultat semestril sut sia direcziun: «Nus guardain enavos sin in semester pretensius. Sco team avain nus cumprovà nossa vischinanza a la clientella.» Cun ils clients da las interpresas pitschnas e mesaunas ha la banca tshertgà soluziuns individualas per impunder a moda raschunaivla las mesiras d'agid cumplessivas. Durant las turbulenzas a las bursas ha ella valità cun ses clients d'investiziun las schanzas e las ristgas a lung termin. «Considerond questa situaziun pretensiusa essan nus fitg cuntents cun la prestaziun da la BCG e cun il resultat. Nossas collavuraturas e noss collavuratur che han dumagnà questa crisa a moda exemplarica meritan in grond engraziament.»

Quasi mantegnì il gudogn dal concern: CHF 95.2 miu. resp. – 5.2% visavi l'onni precedent

Il resultat da fatschenta (CHF 96.8 miu./-6.8%) ha patì da las correcturas da valor als martgads d'acziun. Il resultat da la fatschenta da tschains e da ristga ha dentant pudì equilibrar quai. Il gudogn dal concern sa preschenta cun CHF 95.2 miu. (-5.2%) bler meglier che spetgà l'avrigl. La banca privata Bellerive AG ha contribuì sin fundament da sias structuradas da retgav in resultat identic a quel da l'onni precedent. Il gudogn per il scrit da participaziun è sa reduci per 3.8% sin CHF 37.10 cumpareglià cun l'onni precedent.

Rendita da la fatschenta: correcturas da valor als martgads da chapital han chaschunà damain retgavs

La rendita da la fatschenta (CHF 200.2 miu.) è sa reducida levamain, d'ina vart perquai che las taxas dependentas dal success han mancà per part e da l'autra vart, perquai ch'ins ha stuì far adattaziuns da la valor necessarias da las vaglias en l'agen possess en l'autezza da CHF 9.2 miu. resp. 4.4%. Las consequenzas existentas e futuras dal reschim da tschains negativs pon vegnir reducidas per part cun l'augment da l'import liber da la Banca naziunala svizra. En l'emprim semester na lascha il lockdown nagins fastizs en furma da pli autas rectificaziuns da la valor.

La quota da la fatschenta da cumissiuins e da servetschs resta sur 30%

Il resultat da la fatschenta da cumissiuins e da servetschs è sa reduci per 9.9% sin CHF 60.0 miu. (CHF -6.6 miu.). Il retgav da las taxas dependentas dal volumen e da la performance è stà pertutgà dal svilup dals martgads durant l'emprim semester 2020. La quota dal retgav è sa reducida sin 30.7% pervi da la diminuziun dal retgav (perioda da l'onn precedent: 32.2%). La finamira strategica da 30% cuntanscha la banca vinavant, malgrà las correcturas da valor a las bursas. La fatschenta d'investiziuns è sa sviluppada en il rom da las finamiras strategicas. L'Albin Kistler AG ha danovamain contribuì al resultat cun in import legraivel. Ils fonds emess da la BCG daventan adina pli populars, quai che sa manifestescha er en il volumen da fonds da CHF 1.7 milliardas.

Investi dapli en la digitalisaziun

Ils custs da fatschenta (CHF 94.3 miu.) inclus l'indemnisaziun da la garanzia chantunala èn s'augmentads visavi l'onn precedent per CHF 2.8 miu. (+3.0%). Il project da giubileum #gkb2020 ed in pli grond volumen da projects en il rom da l'offensiva da digitalisaziun giustifitgeschan questas expensas supplementaras. La relaziun da custs e d'entradas II da 51.1% (+4.1 puncts procentuals) è s'augmentada levamain visavi l'onn precedent. La productivitat resta in tema impurtant da la banca. Las investiziuns cuntinuadas en la digitalisaziun han perquai vinavant in'auta muntada.

Volumen da fatschenta net: +1.45 milliardas francs

Cun il rendaquint semestral 2020 preschenta il concern da la BCG in volumen da fatschenta da CHF 57.0 mia. Il volumen da fatschenta net cun clients munta a CHF +1.45 mia. Quai corresponda ad ina creschientscha netta da +2.6%. La banca ha augmentà il volumen d'emprests a la clientella per CHF 389.3 miu. (+1.9%). Ils emprests ipotecars èn creschids per 1.6% sin CHF 17.6 mia. La banca ha pajà CHF 175.1 milliuns netto per credits COVID-19. La facultad da la clientella è s'augmentada per 0.9% sin CHF 36.5 mia., malgrà la performance negativa als martgads. L'afflussiun da novs daners relativa a la facultad da la clientella (Net New Money) ha importà en total 1'075.6 miu. (+3.0%). La renunzia al consum ordinada dal stadi ha augmentà considerablamain ils deposits da clients.

Perspectivas per il 2020: in meglier resultat operativ che spetgà l'avrigl

Sin fundament dal resultat semestral valitescha la BCG a moda pli positiva las perspectivas per il 2020. Il restabiliment dals martgads d'acziun sco er ils segns mancants da pli grondas ristgas da sperdita influenzeschan las aspectativas a moda positiva. Quellas èn per il mument da valitar in zic meglier che las cifras communitgadas l'avrigl. Il gudogn dal concern spetgà actualmain munta a var CHF 170 milliuns e per il scrit da participaziun pon ins quintar cun in gudogn da circa CHF 65.00.

Sa posiziunar en il martgà da provediment cun ina „interpresa grischuna da provediment“

Il cussegl da banca ha decis ils 22 da fanadur 2020 da fundar per motivs strategics ina societad d'administraziun independenta per soluziuns da provediment. Grazia a quella duai vegnir amplifitgada en il Grischun la cumpetenzza per temas en connex cun il provediment. La finamira è da realisar quest project en collavuraziun cun spezialists, uschia che la societad po cumenzar sia activitad operativa il 1. da schaner 2021. L'importanza da l'administraziun da daners da provediment crescha cuntinuadamain en la fatschenta d'investiziuns. La BCG rinforza uschia sia posiziun sco partenaria cumpetenta per investiziuns performantas per cassas da pensiun, fundaziuns e persunas privatas.

Giubileum #gkb2020: ils accents principals pon vegnir realisads

Il motto dal giubileum „Metter accents persistents“ sa cumprova. Ils accents principals pon vegnir realisads tenor plan. Sulettamain per las inscenaziuns han ins stuì prender en cumpra restricziuns. Il punct culminant dal giubileum da la banca ha lieu l'atun cun l'avertura d'in center da visitaders cun caracter surregional. Cun il center da visitaders vul la banca sensibilisar il public per ils temas aua e glatschers.

Contact per las medias e per investurs:

Banca Chantunala Grischuna, Medias & Investor Relations, Chascha postala, 7001 Cuir

Thomas Müller, thom.mueller@gkb.ch, telefon +41 81 256 83 11

Nadja Maurer, nadja.maurer@gkb.ch, telefon +41 81 256 88 01

Plutarch Chiotopulos, plutarch.chiotopulos@gkb.ch, telefon +41 81 256 83 13

La Banca Chantunala Grischuna sin:

gkb.ch/medien | [Twitter](#) | [Facebook](#) | [Instagram](#) | [LinkedIn](#) | [Xing](#) | [YouTube](#) | [Flickr](#)

La Banca Chantunala Grischuna – il leader en il Grischun

La Banca Chantunala Grischuna porscha tut quai ch'i dovra per ina banca universala moderna – per persunas privatas, l'economia ed il maun public. La banca occupa 1015 collavuraturas e collavuratur (stadi dals 30-06-2020). En il chantun Grischun cun sias numerusas vals e pliras linguas, è l'interpresa represchentada cun 50 agenturas, la sedia principala sa chatta a Cuir. La Banca Chantunala Grischuna è participada a la Banca Privata Bellerive AG a Turitg ed a la Albin Kistler AG medemamain a Turitg. En il rendaquint semestril preschenta ella cun ina summa da bilantscha da CHF 30.9 milliardas in gudogn dal concern da CHF 95.2 milliuns. Il scrit da participaziun BCG è quotà a la bursa dapi ils 10 da settember 1985.

Termins

Quint annual 2020: 4 da favrer 2021

Radunanza dals participants: 24 d'avrigl 2021
